

14 NOV 1997

AS-Peguamcara

PEGUAMCARA NEGARA JUMPA KEDUTAAN AS

KUALA LUMPUR, 14 Nov (Bernama) -- Peguamcara Negara Datuk Heliliah Yusof hari ini mengadakan pertemuan kira-kira sejam dengan para pegawai kedutaan Amerika Syarikat (AS) di bangunan kedutaan itu di Jalan Tun Razak di sini.

Heliliah dilihat tiba di perkarangan tempat letak kereta bangunan kedutaan itu pukul 4 petang sebelum memasuki kedutaan. Beliau keluar kira-kira pukul 5.10 petang.

Ketika ditanya pemberita sebelum meninggalkan perkarangan kedutaan itu, Heliliah berkata ia hanyalah perjumpaan rutin dan tidak kena-mengena dengan draf usul di Kongres AS mengenai Perdana Menteri Datuk Seri Dr Mahathir Mohamad.

Beliau juga enggan menyatakan sama ada ia berhubung kait dengan penyiasatan yang akan dijalankan oleh AS mengenai hubungan perniagaan Petronas dengan Iran.

"Kami berbincang mengenai bermacam-macam perkara... tetapi tiada yang spesifik, ia hanyalah satu rutin," katanya ringkas.

Ketika ditanya sama ada perjumpaan itu ada bersangkutan-paut dengan Perdana Menteri atau isu Petronas, Heliliah berkata; "Ianya adalah selain daripada perkara itu".

Di samping itu, pegawai keselamatan di kedutaan itu berkata sehingga petang ini tiada tunjuk perasaan atau protes diadakan oleh mana-mana pihak.

Semalam kira-kira 100 anggota Pergerakan Pemuda Barisan Nasional mengadakan demonstrasi di hadapan kedutaan itu sebagai membantah draf usul Kongres AS dan penyiasatan ke atas Petronas itu.

Resolusi yang disokong oleh 27 anggota kongres itu meminta Dr Mahathir memohon maaf atau meletakkan jawatan sebagai membantah kenyataannya yang didakwa anti-Yahudi.

Draf usul itu bagaimanapun sehingga ini belum dibentangkan di Kongres.

Seorang Timbalan Penolong Setiausaha Negara AS dijangka tiba di sini 18 Nov ini untuk menyiasat hubungan perniagaan Petronas dengan Iran, dalam hubungannya dengan Akta Sekatan Iran-Libya.

Seorang pegawai kedutaan yang dihubungi mengesahkan pertemuan Heliliah dengan pihaknya tetapi enggan memberi butiran lanjut. -- BERNAMA

IHD NMO